

sammlung seiner mitbruder, die er vff des genanten Caspar ansuchen dorzcu vorsamelt, sein testament vnnnd letzten willen gemacht vnnnd dem closter alhie einen seiner zweier ecker, welchen der vatter prior haben wolde, auch ap sein eliche fraw todishalben abgieng, sein haws vnnnd garthen bescheiden, vnnnd so im die gemelte Caspar Reibtopps nochgelassene witbe solch testament nicht hat wollen folgen lassen vnnnd furgeben, si trug kein wissen dor von, hat sich gemelter vatter prior auch erbothen, solch gescheen testament, wie recht, durch erkenntnis geistlicher adder werntlicher gerichte noch zcu brengen. Haben die obgedachten er Gotz zc vnnnd der rath vff vil anlauffs, so der gemelten frawen halben gescheen, vnnnd sonderlichen befehls vnsers gn. h. hertzog Georgen den vatter priorem vormogt, die sach gutlich zcu entscheiden, das dan also vff beyder parthe bewilligung gescheen, also das dem closter das cleiner stuck ackers solle folgen, domit des obgedachten Reibtopps letzter willen nicht geandert werde, dorfur dan die bemelte fraw, vff das sie mit iren vnerzogen kindern bei solchem erbe pleib, wiewol solch gut gar vil besser, doch vff vleissige bethe des vilgedachtenn hernn Gotzen vnnnd raths dem closter funffzen reynische gulde sal geben vff tagzeit wie hernach folget, funff vff Martini nehstkonnfftig vnnnd vff mitfasten darnoch auch funff vnnnd die vbrigen funff vff nochfolgenden sancti Johannistag Baptistae —. Vnd sal sich des bans halben mit dem geistlichen richter [vortragen?], doch also das sie dem vatter priori adder closter vor gethane derhalb expens nichts widerstaten dorff. Vnnnd wen solche funffzehen reyn. gulden — dem closter vorgeuget seint, sall die fraw vnnnd ir kinder vnnnd erben aller vnnnd weitter anspruch solches ires manes testament halben queit ledig vnnnd los sein vnnnd von dem closter adder vorwessern desselben nymer angelanget werden. Actum die anno et coram arbitris ut supra.

Nach dem Schöffebuch III fol. 90 im Archiv des K. Bezirksgerichts zu Pirna.

## No. 210. 1499. 21. Juni.

### *Seelgeräthstiftung der Familien Große und Gristlau im Dominicanerkloster.*

Wir noch geschribenn bruder prediger ordens des conuentes Pyrne, mit nohmen Dominicus Rudel dye zeyt prior, Jost von Hawßen vnderprior, Johannes Schneider, Johannes Helwig, Vincentius von Radeberck vnnnd Johannes von Wirtzburck dye eldesten mitsampt allen andern brudern vnsers conuentes bekennen vor vns vnnnd vnßere nachkomen, das vns die erbarn vnnnd ersamen Leonhard Große, Vrsula seine eliche hawßefraw, Gunther Gristlaw vnnnd Margaretha seyne eliche hausfraw vor sich vnnnd irer beyder geschlechten selen seligkeit zwelff silberen ß gegeben haben, also bescheidenlich, das wir sollen gotte zculobe vnnnd seiner werden mutter Mariae funffvnnndfunffzig lichte halten, welche licht sollen angezündet werden in allen feyer festen Mariae, nemlich Purificationis Annuntiationis Visitationis Assumptionis Nativitatis vnnnd Conceptionis, vnder den hoemessen burnen sollen vnnnd dye nehsten sonntag noch itzlichem feste, in den begengnißen der bruderschaft Mariae Rosenkrantz vnder der hochmeßen auch pornen sollen. Dieselben lichte sollen\* stecken vff dem eyseren gegitther stheend vor dem altare Vnser frawen Rosenkrantz genant, vnnnd soviel lichte in bestympten tagen vnnnd zzeiten ewiglich zcu halten. Doruber vorwilligen wir vns in vnnnd mit krafft dies briues, den obgemelten vnnnd iren geschlechten zcutrost vnnnd seligkeit eyn iare begengnis an mitwoch noch der vesper mit eyner langen vigilien vnnnd donerstage frwe darnoch mit eyner gesungen messe zcuhalten, dieselbigen tage den achten tag noch Visitationis Mariae seyn sollen vnnnd ewig also gescheen, vnder welchen messen vor die lieben selen oben bestympt offentlich vnnnd ien sonderheit solle gebethen werden. Auch wollen wir dye offtgemelten noch irem abschied in vnsers closters ewig todenbuch schreiben, vff alle wochen des iares offentlich vor sye bithen neben den andern auch eingezeichneten mit ernoehfolgenden gesungenen selmesse zcu ewigen zeiten. Das geloben wir vor vns vnnnd vnsere nach-